



Bentiaraq Ottosen
Atassut sinnerlugu Inatsisartunut ilaasortaq

§ 37 naapertorlugu apeqqut 324/2018-imut akissut

10-01-2019
Sags nr. 2018 - 27017
Akt nr. 9686580

- 1. Kalaallit Nunatta avataanut katsorsartikkiartorlutik aallartartut atugarissaarnerulernissaat pillugu Naalakkersuisut qanoq pilersaaruteqarpat?**

Postboks 1160
Tlf: 34 50 00
Fax: 34 55 05
3900 Nuuk

Email: pn@nanog.gl
www.naalakkersuisut.gl

Akissut:

Kalaallit Peqqissartut Illuat napparsimasunut qanigisaasunullu annertuumik suliaqartoq Naalakkersuisut isumaqarput. Napparsimasut pitsaasunik atugassaqartinneqarput aammalu sinaakkutissat iluini periarfissaqartillugu neqeroorutigineqartunik sullississutinillu atuisarlutik. Peqqinnissaqarfimmi, tassungalu ilanngullugu Kalaallit Peqqissartut Illuanni sullissinermik neqeroorutinillu soorunami ingerlaavartumik nukittorsaallunilu pitsanngorsaasoqarnissaa tamatuma allanngortinngilaa. Ingerlaavartumillu ineriartortitsineq sinaakkutissat atugassarititaasullu sulinermi malinneqartut naapertorlugit ingerlanneqartariaqarpoq.

- 2. Nappaassuarmik kræftimik eqqugaasimasut nunatta avataanut katsorsartikkiartorlutik aallartut qanigisaasa Kalaallit Peqqissartut inaanni inissaqartinniarnissaat pillugu Naalakkersuisut qanoq pilersaaruteqarpat?**

Akissut:

Aaqqissuussineq ulloq 1. januar 2017-imi atuutilersoq naapertorlugu napparsimasut qanigisaminnik ataatsimik peqqissartut illuanni iniminni akeqanngitsumik ineqartitsisinnaalernikuupput. Aammattaaq qanigisaasoq peqqissartut illuanni akeqanngitsumik ullaakkorsiorsinnaavoq. Napparsimasut qanigisaasunik arlalinnik ingiaqateqarunik peqqissartut illuanni inissat apeqqutaatillugit inigisami/inissiami immikkut siniffiliisoqarsinnaavoq akiliisoqarneratigut. Aaqqissuussineq napparsimasunut peqqissartut illuanni najugaqartunut tamanut atuuppoq.

- 3. Kalaallit Nunaata avataanut peqqissariartortunut ilaqutaasut suliffitsik qimallugu aallartariaqartarnerisa kinguneranik suliffimminnik annaasaqartoqarsimatillugu aaqqiissutaasinnaasumik Naalakkersuisut pilersaaruteqarnerlutik?**

Akissut:

Qanigisaasut ilaqtatik Kalaallit Nunaata avataanut peqqissariartortoq ingiaqatiginiarlugu suliffimminnit soraartariaqartut pillugit aalajangersakkanik isumaginninnermi malittarisassat imaqqanngillat.

Oqaatigineqarsinnaavoq S.I.K.-mi isumaginninnermut aningaasaateqarfeqarmat, assersuutigalugu nammineq qanigisarluunniit napparsimalerpat tapiissutinik tassunga qinnuteqartoqarsinnaalluni.

Suliffeqarfinni isumaginninnermut aningaasaateqarfimmut tapiissuteqartartuni sulisuugaanni tapiissutinik qinnuteqarnissamut periarfissaqartoq S.I.K. nittartakkamini paasissutissiivoq. Suliffeqarfiit pineqartut tassaapput KNI, Royal Greenland, Polar Raajat, Upernavik Seafood, Sulisitsisut, Nuuk Imeq aamma Namminersorlutik Oqartussat.

4. Utoqqalinersiallit nunarput qimallugu katsorsartikkiartorlutik aallartartut atugaannik pitsaasumik aaqqiisoqqaqqullugu Naalakkersuisut qanoq pilersaaruteqarpat?

Akissut:

Siusinaartumik pensionisiallit imaluunniit utoqqalinersiallit katsorsartikkiartorlutik nunamut allamut aallarallartut siusinaartumik pensionisiallit utoqqalinersiallu pillugit inatsimmi aalajangersakkat malillugit pisinnaatitaagunik siusinaartumik pensionisiatik utoqqalinersiatilluunniit pigiinnartarpaat.

Tamatumunnga piunasaqaatit naammassisimagaanni immikkut naliliiffigineqarnikkut tapisiaqarnissamik akuerineqarnissamut aalajangersakkanik siusinaartumik pensionisiatik aammalu utoqqalinersiat pillugit inatsit imaqarpoq.

Katsorsartikkiartorluni nunami allaniikkallarnissaq eqqarsaatigalugu pensionisianut inatsimmi aalajangersakkat allannortinneqarnissaat Naalakkersuisunit pilersaarutigineqanngilaq.

5. Kalaallit Peqqissartut illuutaat København-imiittup allineqarnissaa pilersaarutigineqarpa?

Akissut:

Napparsimasut piffissami sivikitsuinnarmi akunnittartut akunnittarfimmi najugaqannginnissaat qulakkeerniarlugu inummut ataatsimut init qulit marluuttariangorlugit allannortinneqarnissaat pillugu maannangaaq oqallisigineqarmat Naalakkersuisunit paasissutissiissutigineqarsinnaavoq. Tamatuma saniatigut peqqissartut illuat inissiat allaffittut atorineqarnissaat pillugu akuersissummik Københavnip Kommunianut qinnuteqarpoq, taamaalilluni illumi allaffiit inissianut nuunnerisigut init amerlineqarsinnaaqqullugit.

6. Kalaallit peqqissartut illuutaat Københavnimiittoq allilerneqassappat qanoq aningaasatigut naleqassava?

Akissut:

Inummut ataatsimut init qulit marluuttariangortillugit aqqissuunneqarnissaat 100.000 kr.-it missaannik akeqassasoq taggineqarpoq.

Allaffiup nuunneratigut peqqissartut illuuta allilerneqarnera peqqissartut illuanni ineqarnermut akiliutip qaammammut 10 t. kr.-inik qaffariaateqarneranik nassataqassaaq. Attartortisoq ininik aammalu perusersartarfinnik/uffarfinnik allannortitserinermik isumaginnittuussaaq. Inissiap allaffittut atorineqarnerani

attartornermut akiliut qaammammut 10 t. kr.-inik qaffanneqassaaq. Tamanna katillugit ukiumoortumik 240 t.kr.-inik aningaasartuuteqarfiussaaq.

7. Tamakkiisumik Kalaallit nunatta avataanut katsorsartikkiartortartut atugaannik pitsanngorsaanissamut aaqqiissuteqassagaanni, Naalackersuisut qanoq missingersorusuppaat aningaasatigut naleqassasoq?

Akissut:

Napparsimasunut nunami allami missortittunut katsorsartittunulluunniit atugassarititaasunik misissuinissamik Naalackersuisut suleqatigiissitaliussamaarput. Napparsimasut sinaakktissat iluini sapinngisamik pitsaanerpaamik atugassaqaartinneqarnissaat suleqatigiinnit qulakkeerneqassaaq. Tamatuma saniatigut napparsimasut atugaannik suli pitsaanerulersitsisinnaasunik allannguutissatut siunnersuutininik suleqatigiissitaliaq saqqummiussisinnaavoq. Atugassarititaasut allanngortinneqassappata tamatumunnga aningaasartuutissanik taggiinissaq suleqatigiissitaliaq suliassaasa ilagissavaat, taamaattumillu tamatuma maannangaaq akissuteqarfiginissaanut periarfissaqanngilaq.

Inussiarnersumik inuulluaqqusillunga

Martha Abelsen